

Panggilan Tiga Malaikat untuk Berdoa

HARI 7 — PERKHABARAN TIGA MALAIKAT, SABAT DAN DOA

*"...kepada mereka akan Kukurniakan dalam bait-Ku dan dalam pagar tembok-Ku suatu tanda pengingat dan suatu nama – itu lebih baik daripada anak-anak lelaki dan perempuan. Aku akan mengurniai mereka nama abadi yang tidak akan lenyap. Dan orang asing yang mengikatkan diri kepada **Tuhan** untuk beribadat kepada-Nya, untuk mengasihi nama **Tuhan**, dan untuk menjadi hamba-Nya, iaitu semua yang memelihara hari Sabat supaya tidak dicemari dan yang berpegang kepada perjanjian-Ku, mereka akan Kubawa ke gunung-Ku yang suci dan akan Kuberikan kesukaan di dalam rumah doa-Ku. Korban-korban bakaran dan korban-korban sembelihan mereka akan diterima di atas mazbah-Ku, kerana rumah-Ku akan disebut rumah doa bagi segala bangsa." – Yesaya 56:5-7 (AVB)*

Diciptakan untuk satu Tujuan

Perkhabaran tiga malaikat adalah satu panggilan nyaring untuk menyembah Pencipta kita. Kita tidak berkembang. Kita bukan suatu hasil kebetulan genetik. Tuhan menciptakan kita dan kehidupan merupakan satu pemberian bernilai yang berasal daripada Yesus. Rasul Yohanes menyatakan, "Ya Tuhan, ya Allah kami! Hanya Engkau yang layak menerima kemuliaan, kehormatan dan kuasa, kerana Engkaulah yang mencipta segala-galanya, dan dengan kehendak-Mu segala-galanya wujud dan dicipta" (Wahyu 4:11). Ia adalah satu pemikiran yang mengagumkan untuk mengakui bahawa kita wujud oleh kehendak Tuhan. Sabat mengingatkan kita bahawa kita diciptakan untuk suatu tujuan. Ia membawa kita kembali ke rumah kita dalam taman di Eden dan mengingatkan kita tentang seorang Pencipta penuh kasih yang menginginkan hanya kebaikan bagi kehidupan kita. Di dalam suatu dunia yang menderita, kesakitan dan berpenyakit, Tuhan atas Penciptaan berjanji untuk "tidak sekali-kali akan meninggalkanmu... tidak sekali-kali akan membiarkanmu" (Ibrani 13:5). Kenyataan ini sahaja sepatutnya mendorong kita untuk bertelut dalam pujian kepada Tuhan kerana pemberian kehidupan dan menemui rancangan-rancangan terperinci yang Dia miliki untuk kehidupan kita.

Sabat—Satu Panggilan untuk Doa, Pujian dan Pernyataan

Sabat juga mengingatkan kita tentang pemberian keselamatan. Sementara kita beristirahat pada Sabat, kita beristirahat dalam pekerjaan Kristus yang telah selesai bagi pihak kita (Ibrani 4:9, 10). Kita beristirahat dalam limpah kurniaNya. Sabat bukan satu tuntutan legalistik yang diberikan kepada bangsa Israel. Ia merupakan satu hari yang dipenuhi dengan kasih kurnia bagi semua manusia yang membuatkan kita bergantung semata-mata dan sepenuhnya pada Kristus bagi penebusan kita (Yesaya 56:6, 7). Yesus menyelesaikan minggu Penciptaan dengan firman, "Demikianlah diselesaikan penciptaan langit dan bumi serta segala isinya. Setelah Allah siap menyelesaikan kerja penciptaan-Nya pada hari ketujuh itu, Dia pun beristirahat daripada segala pekerjaan yang telah dibuat-Nya itu" (Kejadian 2:1, 2). Dia juga memuncakkan pekerjaannya pada salib dengan firman, "Sudah selesai." Kita tidak terlibat dengan pekerjaan penciptaan Kristus pada mulanya. Dia memulakan pekerjaan itu dan menyelesaikannya. Demikian juga kita tidak terlibat dengan pekerjaan penebusan Kristus pada salib. Dia memulakan pekerjaan penyelamatan dan menyelesaikannya. Sabat mengingatkan kita untuk bersukacita dalam kasihNya, beristirahat dalam penjagaanNya dan kemuliaan dalam Kristus yang membayar harga yang begitu tinggi untuk keselamatan kita. Sabat adalah satu panggilan untuk berdoa, satu panggilan untuk memuji, satu panggilan untuk menyatakan kebaikanNya.

Sabat juga mengingatkan kita bahawa kita tidak bersendirian di dalam satu dunia sepi yang mendukacitakan. Keindahan alam semulajadi masih berbicara tentang Tuhan Pencipta pada waktu penderitaan dunia ini. Sabat menunjukkan kita kembali kepada Penciptaan bahkan ia juga menunjukkan kita ke hadapan kepada langit dan bumi baru di mana Tuhan akan menciptakan semula dunia ini dalam kemuliaan Eden.

Sabat adalah satu hari kesyukuran. Kita bersyukur kerana Tuhan menciptakan kita dan mempunyai rancangan-rancangan bagi kehidupan kita. Kita bersyukur kerana Dia menebus kita dan telah membayar suatu harga yang tak terhingga bagi kita. Kita bersyukur kerana Dia akan datang kembali untuk kita dan akan menciptakan suatu langit dan bumi yang baru. Mari kita mencari Dia dengan hati yang penuh kesyukuran sementara kita berdoa.

Waktu Berdoa (30-45 Minit)

Mendoakan Firman Allah – Yesaya 56:5-7

“...kepada mereka akan Kukurniakan dalam bait-Ku dan dalam pagar tembok-Ku suatu tanda pengingat dan suatu nama – itu lebih baik daripada anak-anak lelaki dan perempuan. Aku akan mengurniai mereka nama abadi yang tidak akan lenyap. Dan orang asing yang mengikatkan diri kepada Tuhan untuk beribadat kepada-Nya, untuk mengasihi nama Tuhan, dan untuk menjadi hamba-Nya, iaitu semua yang memelihara hari Sabat supaya tidak dicemari dan yang berpegang kepada perjanjian-Ku, mereka akan Kubawa ke gunung-Ku yang suci dan akan Kuberikan kesukaan di dalam rumah doa-Ku. Korban-korban bakaran dan korban-korban sembelihan mereka akan diterima di atas mazbah-Ku, kerana rumah-Ku akan disebut rumah doa bagi segala bangsa.”

“Kepada Mereka”

Tuhan, Engkau menciptakan kami semua. Engkau mengkehendaki kami wujud dan menginginkan persekutuan abadi dengan kami. Ya, Engkau menginginkan keselamatan semua manusia. Setiap bangsa dan suku dan kelompok orang. Kami memuji Engkau! Terima kasih untuk Sabat mingguan yang mengingatkan kami realiti ini.

“Semua Yang Memelihara Hari Sabat Supaya Tidak Dicemari”

Tuhan, seringkali kami telah melanggar Sabat atau tidak memelihara kesuciannya. Tolong ampuni kami. Bantu kami untuk mempertahankan jam-jam Sabat dan terutamanya mengakui dan meninggikan Engkau sepanjang Sabat. Bukakan mata dan telinga kami untuk memahami dan melakukan kehendakMu setiap hari supaya kami boleh merayakan dan bersaksi tentang kesetiaanMu sepanjang minggu pada hari Sabat.

“Dan Yang Berpegang Kepada Perjanjian-Ku”

Yesus, terima kasih kerana Sabat bukan sahaja satu tanda dan peluang untuk mengingati Engkau sebagai Pencipta kami bahkan satu tanda keselamatan. Terima kasih kerana kami dapat beristirahat di dalam kepastian kebenaranMu yang menyelubungi dan memenuhi kami sementara kami berpegang teguh kepada janji-janji perjanjianMu. Semoga pemeliharaan Sabat kami menjadi satu pengalaman setiap hari tentang kesetiaanMu kepada kami.

Cadangan Lanjutan Doa

Kesyukuran dan Pujian: Berikan kesyukuran bagi berkat-berkat tertentu dan puji Tuhan kerana kebaikanNya.

Pengakuan: Ambil beberapa minit untuk pengakuan peribadi dan bersyukur kepada Tuhan kerana pengampunanNya.

Bimbingan: Minta Tuhan untuk menganugerahkan kebijaksanaan bagi menghadapi cabaran dan keputusan semasa.

Gereja Kita: Berdoa bagi keperluan-keperluan gereja di peringkat wilayah dan sedunia (lihat lembaran berasingan yang berkaitan dengan permintaan).

Permintaan Setempat: Berdoa bagi keperluan-keperluan para anggota gereja, keluarga dan jiran tetangga.

Mendengar dan Menyahut: Ambil masa untuk mendengar suara Tuhan dan menyahutnya dalam pujian atau lagu.

Cadangan Lagu

SDA Hymnal: Crowning Jewel of Creation (#385); How Sweet Are the Tidings (#442)

LPMI: Ingat Hari Sabat (#221); Oh Hari Perhentian! (#219); Nyanyikan Berulang-Ulang (#108); Yesus Yang Berkasihani (#41); Di Tempat Yang Lebih Tinggi (#175); Hai Skalian Orang (#96)